

**AKASHVANI AIZAWL**

**REGIONAL NEWS BULLETIN**

1. Union Education Minister Dharmendra Pradhan chu vawiin khan a nihna atangin a bang.
2. Chief Minister Pu Lalduhoma leh kohhran hruaitute vawiina inhmukhawm chuan FCRA Amendment 2026 Bill an pawmloh thu Union Home Minister hnena thlen an rel.
3. Chief Minister Pu Lalduhoman Mizoram a chengte inngeih chhan pawimawh tak chu hel pawl awmlohna state a nih vang a ni, a ti.
4. Assama tuilianin ziaawm lam ala pan loh vangin mipuiten harsatna an tawh nasa tawh hle.

<><><>

**UNION MINISTER EDU RESIGN**

Union Education Minister Dharmendra Pradhan chu vawiin khan a nihna atangin a bang. Hun engemawchen ramchhunga thalai lungawilohna lantirten bang tura an nawr hnuah Pu Pradhan-a hian Prime Minister Narendra Modia hnenah vawiin khan banna a thehlut a. Social media lamah Pu Pradhan-a chuan ni 10 kalta chhunga zirlaite lungawilohna lantir avanga thil thleng chu pawl a tih thu a sawi a. New Delhi-a Jantar Mantar-a lungawihlohna lantirna leh ramchhung hmun danga thil awmdante a thlirin Prime Minister Narendra Modia hnenah banna a thehlut a ti a. Tuna thil thleng mek hi ram tana pawikhawih tumtuten remchangah an lak an hlah avang leh thalaite hma hunah harsatna a awm loh nan a bang tih a sawi a ni.

Union Minister chuan Prime Minister Narendra Modia chu a kaihhruaina, a rinna leh a thlawpna avangin lawmthu a hrih a. Ram rawngbawl hna chu a hnaa a ngaih pawimawh ber anih reng thu sawiin theihtawp a chhuah zel dawn tih a sawi a ni.

NEET-UG 2026-a thil diklo chungchang sawilangin Pu Pradhan-a chuan thil diklo chhui turin sawrkar chuan CBI kutah thuneihna a hlan a ti a. Exam pawh cancel vek anih thu sawiin exam tha leh tura ruahmanna siam a ni a ti a. Kum thar atang chuan Computer Based Test (CBT) an kalpui tawh dawn tih a sawi bawh a ni.

Pu Pradhan-a chuan buaina a thlen tirh atangin mawhphurhna chu a lak nghal thu sawiin vawi khatmah a tlanche lo a ti a. July ni 16 a NEET-UG result tihchhuah pawh a lungawithlak atih thu a sawi bawh a ni.

Hetihlai hian vawiin tlai khan sawrkar aiawhin Union Minister JP Nadda leh Dr.Jitendra Singh leh lungawilohna lantir mektu Cockroach Janta Party hruaitute chu a vawi thum nan an inbe leh a. Exam dan kalphung siamthat leh paper putru thin venna tura an phutte an sawiho a ni a.

An inbiak zawh hian chanchimnbumite an kawmnaah CJP thupuangtu Ashutosh Ranka chuan an thilphutte sawrkarin a tihhlawhtlinsak vek dawn tih a sawi a. Lungawilohna lantir mek pawh buaina awm loin an titawp nghal dawn tih a sawi a ni.

(Byte of CJP)

Union Minister JP Nadda pawhin he hunah hian thusawiin NEET exam tihchingpen avanga mahni nunna chante an tawrhpu thu leh zangnadawmna pawh pek an nih tur thu a sawi a. Exam kalphung siamthat dan tura rawtna an thlente pawh an pawm sak thu sawiin ngun taka an ngaihtuah chhonzawm tur thu a sawi a ni.

<><><>

**CM:**

Chief Minister Pu Lalduhoma hova Mizoram Kohhran Hruaitute Committee (MKHC) leh Council OF Churches In Mizoram (CCM) hruaitu vawiina thukhawmte chuan FCRA Amendment 2026 Bill chu pawm theih a ni lo tih sawiin, Union Home Minister hnena Memorandum thehluh an rel.

Vawiin chawhnu dár 3 khan Chief Minister Bungalow-ah Chief Minister hovin MKHC leh CCM hruaitute chu FCRA Amendment 2026 chungchangah an thukhawm a, he dan siam that dan chungchang hi inpawh tlâng taka sawiho niin tuna Bill ang hi chuan pawm theih loh ah ngaih a ni an ti a. Tihdanglam rawtna chu Memorandum hmangin sawrkarin lo buatsaih se. Chief Minister in Home Minister hnenah appointment buaipui se, MKHC leh CCM hruaitute nen Delhi ah Memorandum thehluh ni se tih an rel a ni.

Chief Minister hi Adviser to CM Pu Lalmuanpuia Punte leh TBC Lalvenchhunga ten an tawiawm a ni.

<><><>

**BIRTH & DEATH STATS :**

Kumin kum chanve chhungin Mizoramah naupiang 10,643 leh mitthi 4,156 an awm.

Mizoram Directorate of Economics & Statistics-in a tarlan danin, kumin kum chanve chhunga naupiang 10,643 zinga 5,269 te chu mipa niin, midang 5,374 te chu hmeichhia an ni a. Hemi chhung veka mitthi 4,156 zinga 2,647 chu mipa niin midang 1,509 chu hmeichhia an ni.

Kan corr report ngaithla ang,

*Kumin thla 6 chhungin January thla kha naupiang tam ber thla niin, naupiang 1,845 an awm a. June thla kha mitthi tam ber tum niin, mi 843 an thi a ni. Aizawl district chu kumin thla 6 chhunga naupiang leh mitthi tam berna district niin, naupiang 4,564 leh mitthi 2,114 an awm a. Khawzawl district chu naupiang tlemna*

*ber niin, kumin thla 6 chhung hian naupiang 67 an awm a. Hnahthial district chu mitthi tlemna bet niin, kumin kum chanve chhungin mi 82 an thi a ni.*



**JT HNAMPUAL MEET**

Chief Minister Pu Lalduhoman Mizoram chu a chhunga chengte inngeih taka an chen theihna chhan pawimawh tak chu hel pawl awmlohna state a nih vang a ni, a ti a.

Vawiina Aizawl-a Joint Hnampual Meet-2026, Joint Hnampual Students’ Organisation (JHSO) buatsaih a hmanpuinaah he thu hi sawiin Chief Minister chuan kumin April ni 30 khan hnampual helpawl awm chhun HPC (D) Lalhmingthanga Sanate Faction-te chuan ralthuamte tungin, Mizoramah hnampual hel pawl awm tawh lovin, remna leh muanna chu a tak ramin a lo thlen thu a sawi a. Hel pawl awm lohna state chhawm nung zel turin kalkhawmte chu a fuih bawk a ni.

Chief Minister chuan Zofate chu inpumkhata an awm a pawimawh thu a sawi a, Hnam inpumkhatna turin tawng thuhmun hman tlan a pawimawh a, Mizoramah hnampual tin ten mahni tawng theuh humhalh chungin inpawh lehzual turin tawng thuhmun hman theih a tul a ti a. Mizo tawng tihhausak zelna kawngah pawh Hindi te, Sap tawng te la chhawng lovin, Mizo hnampualte tawng leh thumal zawk sengluh chhin a pawimawh tiin a sawi bawk.

He hun hmanpuitu dang Pu Lalmuanpuia Punte MLA pawhin thu sawiin, thalaite leh zirlaite chu hnam chanvo humhalhtu pawimawh tak leh hnam inlungualna thleng tura mi pawimawhte an ni a ti.

Joint Hnampual Meet buatsaihtu JHSO hi Hnampual zirlai pawl hrang hrang- Mizoram Bawm Students Union, Ranglong Student Union, Hmar Student Association, Pang Zirlai Pawl, Siamsinpawlpi, Lai Student Association leh Mara Student Organisation inzawmkhawm an ni.



**RINI AI**

Mizo tawng atanga tawng sawm lehlin theihna Rini AI Speech chu khawvela ram 50 vela cheng mi singli chuangin an hmang tawh.

Akashvani Aizawl News-in a kawmnaah Rini Speech AI CEO Dr. Maria Sailo chuan he thu hi sawiin, tawng chu hnam humhalhna pawimawh ber anga an ngaih avangin Rini Speech AI chu Mizo tawng chawisanna leh humhalhna atan an siam tih a sawi a. Internet ah tawng lehlin theihna awm nual mahse Mizo tawng duh tawka dik leh tha taka letling thei a awm loh avangin nikum September thla atang khan an nupa in hma an la tan a, kumin May ni 21 khan Rini Speech AI chu hman theih turin an tlangzarh a, thla khat leh a chanve chhungin khawvela ram 50 vela cheng mi singli chuangin he app hi an install tawh tih a sawi a ni.

Byte: Dr Maria

Dr Maria chuan tun dinhmunah Rini AI Speech hi Mizo tawng atangin tawng sawm-Japanese, Korean, Chinese, Thai, Hindi, English, Spanish, German, French thleng khanin a inlet thei a. Khawvel hmun hrang hranga Mizoten an hmang tangkai

hle tih sawiin, he app hmangtu Mizoram pawna damlo leh, damlo hruaitute bakah lehkha zir leh hnathawk te chu tawngah an buai tawh lo a ti a. Missionary te pawn rawngbawlnan te an hmang tangkai hle tih sawiin, hetiang taka Mizoten an lo tangkapui hi an lawm hle tih a sawi a ni.

<><><>

ACCIDENT

Vawiin chawhnu dar 1:30 P.M bawr vel khan Pick up motor Aizawl atanga Pang khaw lam pan chu Hnahthial Dist Thiltlang daiah chesualin mi 1 a thi.

Pick up ah hian hmeichhe 3 leh mipa 2 an chuang a, Thi hi Pu Zoramcheua Pang khua a ni a, Hnahthial Dist hospital thlen hma in a hlaim tuar lovin a thi a ni.

Chetsualna thlenna bul a in nei tu ten an hriat velah VC te be nghalin. VC ten ahmun an thlen hian Hnahthial Police lam an hriattir nghal a. Hnahthial police lam pawh ahmun thleng an nghala. Motor chetsual chhan hi an tlanchak vang ni a hriat a ni.

Pu Zoramcheua ruang hi post-mortem anih zawhah Thiltlang YMA ten an la anga. Thiltlang atangin Pang khaw lam pan pui ani ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

WEATHER

Indian Meteorological Department (IMD), Aizawl Director Sudheer Kumar Dwivedi chuan, tunlaia Mizoram hmun hrang hranga fur ruah sur mek chuan ni 2 vel ala awh dawn nia a lan thu a sawi a; fimkhur turin mipuite a chah.

Akashvani News Aizawl zawhna chhangin Pu Sudheer Kumar Dwivedi chuan tun ni 2 lo awm turah ruah a la sur chhunzawm thei a, hmun thenkhatah chuan nasa taka ruah sur thei a nih thu leh leimin tenau pawh thleng thei a nih thu a sawi.

Pu Dwivedi chuan mipuite fimkhur tura chahin, chhum a tam avangin lirthei khalhtute pawh fimkhur taka lirthei khalh turin a chah a; Disaster Management & Rehabilitation dept-in inkaihhruaina a siamte leh traffic rules-te zawm turin a ngen a ni.

<><><>

ASSAM FLOOD

Assama tuilianin ziaawm lam ala pan loh vangin mipuiten harsatna an tawh nasa tawh hle. Tun dinhmunah state chhunga mi nuai 1 sing 1 sang 5 chuanguin harsatna tawkin chhawmdawlina camp hrang hrangah an khawsa lailaw ek a.

Sivasagar, Charaideo leh Jorhat district te chu tuilian tuar nasa ber an ni a. Vawiin khan tuilian avanga chhiatna thlengah hian mi 14 an thi leh a. Heti hian tuilian avanga thi zat hi 61 an tling tawh a ni.

Prime Minister Narendra Modia chuan vawiin khan Assam Chief Minister Himanta Biswa Sarma biain state chhunga tuilian avanga harsatna an tawh dante a sawipui a. PM Modia chuan sawrkarin tanpuina awm theite a pek tur thu a sawi bawk a ni.

<><><>

**PM MANN KI BAAT**

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 136-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>